

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA APERILA 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

OSIGA FEAGAIGA EFKS LUFILUFI



Susuga Asotasi Gu Time FT, Konelio FS & Iota Tuiai, Misipalauni Faatau FT & Pati Vili FT @ EFKS Lufilufi



O le maota fou o le Faafeagaiga & Aiga, o le EFKS Lufilufi

O LE FAASINO UPU

1. O LE LAUGA.....2
 2. ASO MALIU & TOETU...3
 3. OSIGA FEAGAIGA LUFILUFI...4
 4. LAFOA'I LE MEA O I LOU LIMA...5
 5. SESE ANANAFI, VAVEGA TAEAO...5
 6. OSIGA FEAGAIGA LEFAGA...6
 7. TALIALUPE O MAUNU...6
 8. TAELEGA I LE VAOMATUA...7
 9. FAASOLOGA FONOTELE 2025...8
 10. PEROFETA MULIMULI...11
 11. O LE SULU I O'U VAE...15
-

O LE LAUGA

Tusi Faitau: Feagaiga Fou; Mataio 26:59 - 65.

Matua: f65a “*Ona saeia ai lea e le ositaulaga sili o ona lava ofu...*”

Manatu Autu [Aso Gafua 14/4/25]: ‘**Fono Ua Vevesi**’. [E lē o fa’aaogaina le Tusi Faitau o lona aso, a e fia fa’aaogaina le Autu} – **FONO UA VEVESI**.

Afai ua vevesi, lona uiga ua pisa...afai ua pisa, o lona uiga ua fe’ese’esea’i, femisaa’i ma fetaua’i ua leai se filemu; a leai la se filemu, o lona uiga...ua le to’a le mafaufau, a e mafua mai ua le onosa’i le loto...pei o le loto o Kaino i lona uso o Apelu [Kene. 4]. O lona uiga foi ua feupua’i, felaua’i ma fela’ua’i, felotoa’i ma fesopoa’i...ua solia tuaoi; ua lē faapalepale le loto...pei o loto o uso o Iosefa ia te ia [Kene. 37].

O lona uiga ua sopoutu, ua sii le ta, ua solia tapu e tausi mamalu ma tapui...ua leai se fealoa’i, ua felamata’i; ua tiga le loto...pei o le loto o Saulo ia Tavita [1Sam 23]. O lona uiga foi ua leai se fealofani, leai se feavata’i, leai se alofa e lagonaina le loto maualalo, le loto faamagalo, ma le loto lelei...o lona faafigofieina, ua LOTOLEAGA; pei o loto o Iutaia ia Iesu Keriso...a o le lotoleaga, o le loto tiapoloa...a o le tiapolo, e tasi lava lona **loto**; o le tetee i le Atua, ma faaleaga le tagata mai le Atua.

Lea la ua malama i ulugalulepogai o le ‘Autu’-Fono ua vevesi...ona o le loto tiapoloa...

Le **loto** lona na utu tumu ai taitai o le lotu Iutaia agai i le Alii o Keriso...o loo manino i le Fuaitau mai ia Mataio sa tatou faitauina [26:59-65].

F59; “*A o le au ositaulaga sili, ma le taupulega uma...*” o tagata aupito i sili i le sosaiete, e le gata e sili, a o i latou e faia le tonu, o le au fai upu e sailia le pule, e to mai ai le faaiuga, a e fai mai o i latou ‘*uma*’...ua aofia uma tagata silisili i le sosaiete.

Ua ‘au tasi faatumutumu o le Lotu Iutaia e faasaga i le Alii...a e fai mai le autasiga; “...*ua latou saili ni e molimau pepelo ia Iesu...*” e saili le tonu, a o le tonu pepelo...o le loto tasi a le au fai-upu ua tiapoloa. E le faigofie i le tiapolo le Alii; f60; “*a e le’i maua, e ui lava ina o mai molimau pepelo e toatele...*” toe manatu i le taimi mulimuli o le tiapolo ma le Alii i le vao, na tuua faiaina leaga e le tiapolo le Alii...fai mai Luka 4:13, “...*ua faauma e le tiapolo le faaososoga...seia i se aso*” e le malolo le tiapolo, e finau pea le tiapolo, e ui a ina finau vale...toe finau pepelo.

I le faamasinoga la o lo tatou Alii sa tatou faitauina, e le faapea ua iu i le manumalo le finau a le tiapolo. LEAI! Ia a manumalo, ua uma mea moni, a ua tua i mea pepelo. A e ona o loo manino le fetalaiga a lo tatou Alii, Luk 22:54; “...*a o lo outou itu po lenei ma le pule a le pouliuli.*”

Le itupo o taupulepulega pepelo, ma faigā tonu mai molimau pepelo.

Le itupo na tuli mata’i mai e lo tatou Alii, e iloa i ana fetalaiga fai soo; e oo mai le ‘itu aso’ [hour] e tuuina atu ai le Atalii o le tagata i lima o e faomea, ma tagata ese.

Le ‘itu aso’ la lea, ua oo mai, le itu aso e ulu atu ai le Alii i le ‘itupo’ o le tiapolo, le pule a le pouliuli...na o mea foi faa poulipolui e faufau ai.

O le mafuaaga lea e ala ai ona lē tali le Alii i molimau pepelo, aua e silafia e le Alii le tulafono o faamasinoga, a le sa’o molimau, aua le tali fua...a o le ata lea o le itupo a le pouliuli, o le itupo e taaligoligoa ai le fale uma i tala pepelo, e luai mai i gutu pepelo, a e toe ulu i o latou lava taliga ma oo ifo i o latou loto, e tumu i mea pepelo.

A e o le tumutumu o le tala i le faamasinoga o le Alii, o lana tali lea ina ua faato’a i ai ni mea sa’o; f63-f64; faatoa tali lona o Iesu; aua foi o le mea moni, o le mea sa’o, e leai se sese; O IA O LE ALO E TOATASI O LE ATUA.

Peitai, o i tonu lea na tupu ai loa ma le vevesi, lea e faamamafaina e le Autu; le *fono ua vevesi*...le taupulega ua vevesi...a e vevesi ina ua fa’aalia mea moni...vevesi ina ua faalavelaveina e mea faamaonia ia mea pepelo...fuaiupu ua fai nei ma matua; f65;

“Ona saeia ai lea e le ositaulaga sili o ona lava ofu...”; o ona lava ofu...ua toe saeia lava e ia.

Tulou lau faitau; tulouna foi tulaga faalupea o le Aufaitau i le Sulu o lenei masina. O loo luluti pea lagona tuia alofa o le ‘Aso Maliu’ e toe to manatu uma ai i le Faaolataga i ona vaega eseese, e le o se Tala e toe tau faapupulaina, pe toe tau faaulutiaina i lagona...peitai o se faasoa e fia momoli, e le aofia a matagi, e le aia foi i ni fono na vevesi i ina i outou itufia.

A o le fono na vevesi i lo matou atunuu, lo matou malō...ta te manatu ai, leai se eseese ma le feau o lenei fuaitau ma lona autu; e vevesi ona o le loto tiapoloa. Le loto ua le onosa’i, ua le faapalepale, ua le faamamalu ma tapui tuaoi, le loto ua taulamalama, ua faatilo masei, ua leai se loto maualalo, leai se loto faamagalo, leai se loto alofa, ona taupulepule ai lea e saili na o mea pepelo.

Ua se tai taliga i fofoga o le atunuu le vevesi, a e sili ona lē leoa lo tatou Alii, ona e vevesi ma logologoa i mea lē mautinoa, le faamaonia, lē suesueina lelei, a e faufau molimau pepelo. Afai foi e tupu pea le loto tiga ona o ni mea tatanu ia nā i le elelee, fai mai le Lagi ia Kaino; “o loo alaga mai le elelee le toto o lou uso” Ken 4. Afai foi e soona tuliaupū ona o le solasola mai le mea moni; fai mai le Salamo; ‘ou te alu ea i fea ai lou Agaga? Ou te sola i fea ai ou Luma? Poo le lagi o i ai Oe, po o Seoli o i ai Oe, po o tuluiga o le sami, Faauta, o i ai i soo se mea lo tatou Atua’ (Sal 139).

Manatua le upu a se tasi o Taitai o le Talalelei ua taoto i tia; a le lagonaina e le tagata lana pepelo, o loo fofoga le Lagi o loo i ai le Atua e lē lilo ai se mea. Fai mai Ioane ina ua toeaina; “O se lē alofa, ua le ia te ia le Atua, aua o le Atua o le Alofa lava ia” (1 Ioa 4:8}. E tutupu nei mea uma ona o le leai o se alofa. O le alofa e lavatia mea uma, o le alofa e mulumulu ‘aufoe ai...o le alofa e toilalo ai le tiapolo, ona tineia ai lea o le loto leaga a e faatupu le loto mamā, ona iloa atu ai lea o le Atua; aua ua fetalai Keriso; o le tagata e loto mamā, na te iloa atu le Atua.

Afai la o le Atua o le Alofa, fai mai Ioane 4:11 ‘afai ua faapea ona alofa mai o le Atua ia i tatou, e tatau ai ona tatou fealofani.’ E tau faamanatu ea lena alofa? Ae a lona faamasinoina ma tuuaiaina fua? A e a ona puapuaga a o amo lona satauro? A e a lona faasatauroina? Po o ai ea i tatou o tagata e le lagonaina nei mau tiga? A o tiga mo i tatou. Fai mai la tatou gagana; ‘e ū ifo tau i le pa’u’...e toe loto

leaga ea i lou uso? E toe vevesi ea ma lou uso? E toe lamalama ea le uso, o lou tino ma lou toto?

Na faasatauroina Keriso, na tanumia i le tuugamau, a e ua toe soifua ina ia tatou toe ola uma i le ola faavavau. Ia tatou tuu ia o tatou loto, a e tutumau atu ia te ia.

Manuia le alo atu o le Ekalesia i lana Fonotele...Ia i le Atua mamalu le viiga e faavavau...Amene.

Saunia: Susuga Timoteo Tapelu FS

EFKS Faleasi’u,

Matagaluega MALUA

ASO MALIU MA LE TOETU IA APERILA

O le masina nei na faamanatu ai nisi o aso taua i le kalena a le Ekalesia: le vaiaso paia na amata i le Aso Sa o Laupama, 13 Aperila, faasolo atu i le Aso Faraile Lelei (Aso Maliu) 18 Aperila, ma le Aso Sa o le Toetu 20 Aperila. E mautinoa sa tele auala eseese e faamanatu ma faamamalu ai nei aso faailogaina o lo tatou faaolataga, e le gata i faatinoga a Aulotu e ala i Aoga Aso Sa ma Autalavou, a e faapea foi i le laugaina o le Upu. O mafauauga faaleagaga o le Vaiaso Paia na faavae i le Evagelia a Luka - le tusitala na te faamamafa le alofa mutimutivale o le Alii o Iesu i tagata tuulafoa’iina ma sauaina, tagata faatauva ma matitiva, o le itupa o fafine, o i latou uma nei e i ai lo latou nofoaga i fuafuaga mamana a le Atua. O Luka foi na te faamamafa le faaolataga mo le lalolagi atoa, o Iutaia ma tagata ese, faapea foi ma le galuega mana a le Agaga Paia ma lona sao taua, i le galuega faaola a Iesu ma le Ekalesia.

O le tala a Luka i le Toetu, o loo tutusa a latou molimau ma isi Faievagelia - o fafine na latou ulua’i usu e asi le tuugamau, o ulua’i molimau foi ia o le Toetu, na latou tau atu ua fulieseina le maa, na ta’u ane e agelu ia i latou, ma latou ta’u atu ai ia Peteru ma le au soo, lea tala uiga ese le ofoofogia. Peitai e i ai foi auiliiliga e ese mai ai le molimau a le foma’i nai lo isi. E pei o tina e toatele na asiasi, o le to’alua o agelu na faailoa ane, ma le tamo’e a Peteru i le tuugamau. Na iloa ua leai se tino o Iesu, ua toe soifua manumalo. O ‘ie na tuufaatasi, o loo fia ta’u mai ai e Luka, e le’i aveeseina le tino e se tasi, e pei ona molimau pepelo ai nisi. Ma le isi, o le faailoga o ‘ie, e ta’u mai ai, lona toe afio mai i se aso. Aleluia!

OSIGA FEAGAIGA **EFKS LUFILUFI**

O le Aso Faraile 25 Aperila na osia ai le feagaiga a le EFKS Lufilufi ma lo latou faafeagaiga, le susuga Konelio Tui'ai FS ma le faletua ia Iota. O le Toeaina o le Pulega a Anoomaa, susuga Tafa'i Galumalemana FT (Falevao) na ia ta'ita'i le sauniga. O tatalo na saunia e le susuga Onosa'i Soo FS (Saoluafata), a o le faitauina o le Tusi Paia ma le Lauga na saunia e le susuga Peni Meaalofa FS (Faleapuna). O le sauniga lenei na maitauina ai le suia e le Toeaina o le faasologa masani o le sauniga osiga feagaiga e pei ona faasino mai e le Tusi Failotu, "Ia Viia Lou Suafa". Na muamua saunoa le susuga i le faafeagaiga e tusa ma la la'ua tali atu i le valaau mai o le Ekalesia, a e mulimuli ai fai le molimau a le Aulotu, i la latou filifiliga sa fai, faapea lo latou valaau atu i le faifeau ma le faletua. Na latou folafola foi o le a latou tausi la latou pito laau o le feagaiga, ma galulue faatasi ma le auauna a le Atua, e ati a' e le Ekalesia a Keriso mo le faaolaina o agaga o le fanau a le Atua.

Na faatumulia le sauniga i le paia o le Ekalesia, i le Pulega ma le Matagaluega Apia Sasa'e (Pulega a Ma'a & Fagaloa). Na auai le Taitaifono Fono Tele susuga Tunumoso S. Iosia FT ma le faletua, o le Taitaifono Komiti Au Toeaina susuga Asotasi Gu Time FT, Misipalauni Faatau FT (Komiti Faatonu Faleata), Pati Vili FT (Komiti Faatonu Lotofaga Lepa Aleipata), Aila Patea FT (Komiti Faatonu Vaimauga); Fili Si'a Matalavea FT (Komiti Faatonu Malua); o i latou foi sa faafeiloa'i aloaia le faifeau ma lona faletua. Na auai foi nisi o le mamalu faalemalo, le afioga Hon. Laaulialemalietoa Leuatea ma Hon. Mau'u Siaso, aemaise le mamalu o aiganalua ma le afioaga o Lufilufi. Na tauluga le sauniga i le Sakarameta o le Faamanatuga na ta'ita'i e le susuga Konelio.

O Konelio na i'u mai Malua i le tausaga 2021, ona galue lea o le faia'oga i le Kolisi Maluafou, ma faau'u ai i le tofi Faifeau Samoa i le 2024. O ia o se lupe faalele a aiga ma le afioaga a o le Aulotu i Togo ma Saleimoa. O le faletua ia Iota o le taulaga soifua a aiga ma le afioaga o Letui. Ua sui tulaga i la'ua i le galuega i Lufilufi sa i ai le susuga Vaigalo Maua FT ma Petimara ua penisione. Ia faamanuia tele le Atua ia te oulua ma le galuega ua valaauina ai, se'ia oo ina tatalaina le feagaiga i le oti, pe aulia tausaga e penisione ai, e tusa ma le pule alofa a le Atua.

MAOTA FOU FAIFEAU, **EFKS LUFILUFI**

O le mae'a ai o le osiga feagaiga a le Ekalesia i Lufilufi, na faapa'ia ai le maota fou o le latou faafeagaiga ma le faletua. O le galuega sa fuafua e faafou e faatali ai lo latou faifeau, peita'i na i'u ina tala atoa i lalo le maota tuai ina ua mautinoa ua le toe saogalemu, a e fausia ai le maota fou. Na siitia teisi foi i luga atu o le nofoaga sa tu ai le fale muamua, ma sa si'omia foi i le pa e puipui mai ai i ona tuaoi, mo le saogalemu ma ia lavea'iina ai nisi faafitauli i le aga'i i luma, e tusa ma le molimau a le sui o le Ekalesia.

O le susuga lava ia Tafa'i Galumalemana FT na ia ta'ita'i le sauniga e faapaia ai lenei maota, a o lona faletua ia Vaele Galumalemana na ootiina le lipine e tatala aloaia ai faitoto'a o le maota. O le afioga i le Taitaifono o le Fono Tele, susuga Tunumoso Soliola Iosia FT na saunoa e molioo le faafetai a le Ekalesia e tusa ma le soifua tautua o le mamalu i le au faatuatua, i le Ekalesia ma le galuega ua faia mo le susuga faafeagaiga ma le faletua. Na momoli ai foi ma le faafetai a le afioga Taitaifono Fono Tele, i le soifua fai taulaga o le Aulotu, Pulega ma le Matagaluega, i tausaga e tele. E le gata a o latou feagai ai ma Toeaina o le Pulega, e pei ona i ai le susuga Vaigalo Maua FT talu ai, a o ona tua atu i le tautuaina o le susuga Mareko FT.

Na tauluga le saunoaga a le afioga Taitaifono, i lona tauaao atu o le meaalofa a le Ekalesia Aoao e \$10,000, e tusa ma ana faiga faavae, mo galuega fou a Aulotu. Malo le ositaulaga, malo le tautua mo le Atua e ala i lana Ekalesia. Mulimuli ane ona tali fuaitau lea o le mamalu o le Ekalesia i Lufilufi, ma fai ana fa'aalologa masani mo le Laulau a le Fono Tele, le Laulau a le Komiti Au Toeaina, le mamalu o Toeaina ma Faafeagaiga, faapea le mamalu o le Malo ma le atunuu sa auai. Na auai foi e molimauina le faamoemoe o lea aso, e le gata o osiga feagaiga a o le faapaiaina o maota o le galuega, le afioga i le Tama a Aiga, le afioga i le Tuiatua, afioga Hon. Tupua Tamasese Efi ma le faletua ia Filifilia Tupua Tamasese Efi.

O le tulaga matagofie lea ua faasolo i ai osiga feagaiga a Aulotu i lenei vaitau - o le fausia o maota fou mo auauna a le Atua o a latou faafeagaiga tau i le lagi. Sa faapea foi i osiga feagaiga talu ai nei a Lotofaga, Toamua, Sinamoga ma isi; e le gata i Samoa nei, a e faapea foi i Matagaluega i fafo. Malo le tautua.

"²Ona fetalai mai lea o le ALII ia te ia, Pe se a lena mea i lou lima? ³Ina lafo ia i le eleele." Eso. 4

Ina ua sola ese Mose mai Aikupito talu lona fasiotia o le tasi tagata (Esoto 2:12), sa leai se mea na i lona lima, na o le toto o le Aikupito. Na sola ese ona o le fefe ia Farao, ona oo atu lea ma nofo i le nuu o Mitiana. O iina na galue faaleoleo mamoe ai i le lafu mamoe a Reuelu le tamā o Sepora lana avā. O lona tootoo sa i lona lima, o lana meafaigaluega lea na tootoo ma faalagolago i ai, o lana auupega foi sa leoleo ma puipui ai, lana lafu mamoe. "²Ona fetalai mai lea o le ALII ia te ia, Pe se a lena mea i lou lima? Ua fai atu ia, O le tootoo. 3 Ua ia fetalai mai, Ina lafo ia i le eleele; ona lafo lea e ia i le eleele, ua liu gata; ona sola ese ai lea o Mose. 4 Ona fetalai mai lea o le ALII ia Mose, Ina aapa atu ia o lou lima, ma tago i lona iu. Ona aapa atu ai lea o lona lima, ua pue atu ai, ona liu tootoo lea i lona lima." Esoto 4.

Ona faatonu lea e le Atua o Mose ina ia toe foi i Aikupito ma fai atu ia Farao e faasaoloto le fanauga a Isaraelu. "¹⁷O lena tootoo foi e te ave i lou lima, e te fai ai faailoga." O le tootoo o Mose sa fai ma faailoga vaaia o lona saogalemu; na puipuia ai o ia mai manu feau. O le faailoga foi o lona malosi faale tamaoaiga – o ana mamoe pe a faatupe ma faatau, o lona tamaoaiga lena. O le tootoo foi sa iloa gofie ai o ia o le leoleo mamoe. Ma, o le mea na tupu i le liliuina o le tootoo e fai ma gata, na faagata ai le tasi laasaga tuai o le olaga o Mose, ma le amataga fou, le laasaga e sili atu ona taua o lona valaauina. O le tootoo na lafo i lalo, sa leoleo ai mamoe, a o le tootoo na ia sii a'e i luga, o le a fa'aaoga e vaeluaina ai le Sami Ulaula, ma ta'ita'i tagata o le Atua i le nuu folafolaina. E liliu e le Atua le tagata tuai e ave ma tagata fou; faapea foi ana meafaigaluega.

Pe afai o loo valaau le Atua ia te oe, e tuu ese lou tootoo o faalagolago i ai lou saogalemu ma lou tamaoaiga, ia 'aue e te fefe a ia usita' i ai. E te maofa i le silisili ese o le tamaoaiga o le a maua mai ai. Na pau le auala e te silafia manino ai lou faasinomaga fou, o le lafo i lalo o lou tagata tuai. E te maua lou tofi ia Keriso, ina ua lafoa'i piitaga ma fesootaiga faalelalolagi o loo e faalagolago i ai. Ona e faia lea o le lavea'i mo nisi tagata, ma vavega tetele e le'i mafaufauina i lou olaga. Lafo loa i lalo le mea tuai, ma si'i a'e i luga le mea fou.

"25 Ua tetepa a'e, ua vaai, faauta, o le malaga a sa Isamaeli...o le a o i latou...i Aikupito." Kene.37.

Pe ana onosa'i pea Aperaaamo ma Sara ma faatali teisi, ona fanau mai lea o Isaako ma faataunuu ai le folafolaga a le Atua ia i la'ua. Peitai sa le'i onosa'i ma faatali, ma o le i'uga e pei ona silafia, ua avane Akara le auauna fafine a Sara ia Aperaaamo, ma fanau mai ai Isamaeli. O le isi suafa o le Atua i le Tusi Paia, o le 'Faaola', auā na te faaola ma toe faalelei, faasa'o a tatou mea sese, ma liliu o latou leaga faaletonu, fai ma mea e a'oa'o mai ai i tatou. Na te mafai ona liliu o tatou leaga, e tutupu ai vavega tatou te mana'omia. E tolu auga tupulaga ua mavae, a e na liliu e le Atua le faaletonu na fai e Aperaaamo, e tupu ai le vavega o le faaolataga, na manaomia e Iosefa. O Iosefa na filifilia e le Atua e fai ma ta'ita'i o Aikupito, e lavea'i lona aiga ma le lalolagi mai le oti i aso o le oge. Peitai ona o le ita o ona uso ia te ia, na latou faatauina ai o ia o se pologa, i le au sa Isamaeli. O tagata ia e tupuga mai ia Isamaeli, le atalii na fanau mai ia Aperaaamo ma Akara le auauna fafine a Sara. A o fea na aga'i i ai? O Aikupito.

"25 Ona nonofo lea o i latou ma fai le 'ava; ua tetepa a'e, ua vaai, faauta, o le malaga a sa Isamaeli ua o mai mai Kiliata ma a latou kamela, o loo ave pulu seturo, ma pulu pasama, ma pulu latano, o le a o i latou e ave ifo ai i Aikupito...28 Ona o ane lea o tagata Mitiana, o e faatauoa, ona latou sisi lea ma avae ia Iosefa ai le lua, ma latou faatau ia Iosefa i sa Isamaeli i tupe e luafulu; ona latou avatua lea o Iosefa i Aikupito." Kene.37.

E leai se mea e uma, vaganā ua fetalai mai le Atua ua uma. E mafai e Ia ona liliu ou gaogaosā na fai i le tuanai, e ave ma vavega e te manaomia i le lumana'i. O lena foi vavega e le gata o le a manuia ai oe, a o isi foi tagata e toatele. Ma e le mailoa po o na tagata, o nisi lava o le tou aiga e pei ona tatou iloa i le tala ia Iosefa.

O le agaleaga o Iutaia ia Iesu, lo latou inoino ia te Ia, na i'u ai lava ina faasatauro e ui ina silafia lelei e faamasino Roma e leai sana agasala. A o le agaleaga lena o tagata, na liliu e le Atua e auala mai ai le faaolataga mo tagata uma, latou te talia ma faatuatua ia te Ia. Le vavega o lona alofa tunoa ua tatou ola ai.

OSIGA FEAGAIGA EFKS **MATAUTU UTA, LEFAGA**

O le Fono Tele o le tausaga talu ai 2024, na malolo penisione ai le susuga Lauama Fonotaga FS ma le faletua ia Elieta, mai le galuega sa galulue ai i le EFKS Matautu-uta, Lefaga. O le masina nei i lona aso 30 na osia ai le feagaiga a lenei Aulotu, ma lo latou faifeau e fa'aauauina le galuega. O le A'oa'o I'u Mai Malua, susuga Viliamu Su'a AM ma le faletua ia Rosehill, o i la'ua ia ua tusi aao i ai le Ekalesia, la te tausia le galuega i lenei auga tupulaga.

O le Toeaina o le Pulega Lefaga ma Faleaseela, susuga Tuitoga Leota FT (EFKS Faleaseela, o lana ulua'i osiga feagaiga lea), na ia ta'ita'i le sauniga mamalu. O le susuga Francisco Fatu FS na saunia tatalo, a o le susuga Toosavili Tua na faitauina le Tusi Paia ma saunia le Lauga - mo le faifeau ma le faletua, faapea foi mo le Aulotu ma le faapotopotoga. Na faaopoopo le ta'ita'i o le sauniga ia saga tapena ma lava taoso le faifeau ma lona faletua mo le galuega tele ua valaauina ai.

O le faasologa masani e pei ona faasino mai e le Tusi Failotu a le Ekalesia (Ia Viia Lou Suafa), na muamua ai ta'utino mai e le Aulotu la latou filifiliga na ta'ita'iina e le Agaga Paia. Sa faapea foi ona ta'utino ma molimau le susuga i le faifeau, e tusa o lo la'ua talia ma le loto maulalo, o tofiga ua faia e le Atua, e ala i le faatofalaiga a le mamalu o le Aulotu. Sa ta'utino foi ma folafola e itu uma e lua, lo latou nofo sauni e galulue faatasi, mo le atina'eiina o le galuega le Atua, ia maua agaga e tele mo le Malo o le Atua ma viia ai lona suafa.

Na faatumulia le sauniga i le mamalu o le Ekalesia, i le Pulega ma le Matagaluega Aana, faapea aiganalua, o uo ma paaga a le faifeau ma lona faletua. Na silasila foi le mamalu o le faapotopotoga, i le IE o le Feagaiga na saunia e le Aulotu, e pine faamau ai le feagaiga e tusa ma le aganuu mamalu a le atunuu pele. Na valaauina sui o le Komiti Faatonu ma Toeaina sa auai, latou te fai ma sui o le Ekalesia Aoao, le Matagaluega ma le Pulega, a o lo latou aao taumatau, e faafeiloai, faatalofa ma faamanuia le susuga faafeagaiga taulagi ma le faletua.

Ona afe ane lea o le mamalu sa auai, e tali le valaau fa'aaloalo a le Ekalesia i Matautu-uta, mo le taumafataga ma fa'aaloaloga masani o aso tetele faapenei. O Viliamu ma Rosehill na i'u mai Malua i le tausaga talu ai 2024. O taulaga soifua a aiga ma afioaga o Tanugamanono, Vaimoso ma Pu'apu'a.

TĀLIA LUPE O MAUNU

*“5 Na fanaua e Poasa o Opetā mai ia Ruta.”
Mataio 1.*

Pe afai e talanoa i gagana faaletagata, e mafai ona faapea, o le avanoa mo se teine o nuu ese e pei o Ruta le Moapi, e faaipoipo atu ai i se mau'oa Isaraelu e pei o Poasa, e itiiti lava le avanoa, e maulalo ifo nai lo le 0. Aisea? Auā o loo faasaina mai i le tulafono a Mose. *“3 Aua ne'i alu se sa Amorī po o se sa Moapī i le faapotopotoga a le ALII; e oo lava i le sefulu o augatupulaga, aua ne'i latou o i le faapotopotoga a le ALII e oo i le faavavau.” Teute.23.* Pe afai e i ai se faitoto'a e matua'i tapuni mau, loka ma faamau i filifili, o le faitoto'a lenei o Ruta. Peitai, pe afai o tagata ma le lalolagi e faia fuafuaga, e mafai e le Atua ona faalēaogaina o la latou pule, a e pulea aoao ai e Ia.

O la le Tusi Paia, *“7 O mea nei ua fai mai ai le Paia, o le Faamaoni ia, o Le ua i ai le ki a Tavita, o Le na te talā, a e leai se na te faamauina; o le na te faamauina foi, a e leai se na te tatalaina.” Fa'aa. 3.* Ioe, o le Atua e umia le ki ma le tatala o lou lumana'i, a e le o tagata ma a latou tulafono po o a latou faiga faavae.

Ua fetalai mai Iesu, *“27 O mea e lē mafaia e tagata, e mafaia e le Atua.” Luka 18.* Na fanau mai lenei fesootaiga o feteenaiga o le lutaia ma le Moapi, o le mauoa ma le mativa, o le tagata e talia ma le tagata na teena, na fanau mai ai Poasa, ma i'u ina fanau mai ai Iesu le Faaola o le lalolagi. O le mea lea, 'aua e te loto vaivai pe tuu itiiti lou faamoemoe, a ia talia lupe o maunu – o mea silisili e le'i uma ona tutupu, o loo faatali mai luma mo oe. Tau ina e ola fiasia i le taimi nei ma olioli i faamanuiaga ua aumai e le Atua mo lenei taimi, a e 'aua ne'i galo le silasila mamao pea i luma i isi mea e sili ona tele ma sili ona lelei. E le na o mea foi e fia faia e le Atua mo oe, a o mea na te fia faia e ala atu ia te oe, mo le manuia o isi tagata.

Fai mai le Atua ia Aperāamo, *“2 Ou te faia oe ma nuu tele, ou te faamanuia foi ia te oe, ou te matua faamamaluina lou igoa; e manuia foi oe...3 Ou te faamanuia atu ia te i latou o e faamanuia ia te oe...e manuia foi ia te oe o aiga uma o le lalolagi.” Kene 12.* O le faamanuia foi lena mo oe; o lea ia e uu mau lena folafolaga, ma ia tago atu loa i ai e faatino! Ma 'aua ne'i galo, e faafetai ia te Ia.

TAELEGA I LE VAOMATUA **(FOREST-BATHING)**

Matua: *“¹⁹Ou te avatu i le laueleele lafulafuā, le arasi, ma le setima, ma le atasi, ma le laau e maua ai le suāu’u; ou te tuuina atu foi i le toafa o le perosi, o le titara, faatasi ma le tasura;”*

E maua taelega, ina ua i ai le vai – vai mai uaga, vaituloto, vaitafe, vai’eli. O le fesootaiga o le vai, ma faasusu le laufanua, e ola ma tutupu ai LAAU, e gaosia ai Vaomatua, fai ai Togalaau, o mataaga lanulauava ma faasao. E lasi ona aogā ma ona tāua. O le Taelega i le Vaomatua, e matafelefele ona uiga faatusa, e i ai foi ona uiga loloto faaleagaga. E lē faapito i le faafouina, na o le malosi i le tino, ma le soifua maloloina o le tagata, i lona malolo ai i le paolo pe koleni fa’aafu ai i le mālū o laau. Ae o le taelega foi e toe faafoisia ai le mafaufau, faaosofia ai le loto, ma fanaufouina ai le agaga.

Onisi aogā o leni taelega, e faamamā, tafi ese, fufulu ma faate’a ese ai otaota, le pefu ma le ‘ele. O le taelega e faamaloloina ma togafitia ai manu’a, papala ma gasegase, o ila ma pona o le tagata. E magalo ai oona o ananafi.

O le vai o le taelega o vaomatua, e taga foi ona taumafa, e inu malie i faamanuiaga, e te’a ai le galala o itutino eseese, o le tagata atoa.

O le taelega e faaosofia ai moegaluaga, e totego pei ni ufi e tutupu, lagona o le loto ma le mafaufau. Ina ua faamatagofie ai le siosiomaga atoa; ua lē o toe manatua se nofoaga tuufua ma gaogao, a ua ainā, ma nofoia e tagata. E mamā, e faatosina loto.

O le Taelega e tofutofu ai, e papatiso ai le loto ma le agaga; o le vai e faau’u, faapa’ia ai, e vavaeseina ai mo se misiona faapitoa. E faatupu faamoemoe, e faatupuola, a e aumai faatasi ma lu’itau, e saga tofotofoina ai le malosi o i ai; o avanoa matala e ofo atu ai le ola tautua.

O se taelega i le vaomatua faapea, na vaaia e le perofeta o Isaia, a o faatafea le nuu o Israelu i totonu o Papelonia. O le gagana o valoaga i le faaolataga tele, o le a fai e le Atua, e faasaoloto lona nuu, o nofo pologa i nuu ese. Lea na fa’aaoga ai le ata faatusa o le toafa mamago, ma laufanua lafulafuā, e leai se vai, leai ni laau ma vao e ola ai. E faatusa i ai le soifuaga o le tafeaga.

I le vaai a Isaia, o lea ua tafa ata, ua suluia e le malamalama, e tafi ese le pogisa, o le faanoanoa ma puapuaga. O suiga ofoofogia ma silisili ese, o vavega

tetele e fai e le Atua, na te foafoa, fesuia’i ma feluia’i ai le natura o mea, i lana lava pule faitalia - o vaomatua ma toafa, o fanua mamago ma elelee matutu, o le a fetafea’i ai vaitafe ma pupuna ai vaieli. E tutupu a’e ai laau, ua lanu lau’ava, lauusi. O laau e faapaolo ai le auala e ui ai, ma malolo ai le malaga umi, o le a toe foi i Kanana, lo latou tofi folafolaina.

Ou te avatu i le laueleele lafulafua, le arasi, ma le setima, ma le atasi, ma le laau e maua ai le suāuu; ou te tuuina atu foi i le toafa o le perosi, o le titara, faatasi ma le tasura.

O upu a le atunuu, E tele laau o le vao, a e iloga lava laau aogā. Ua manino fuainumera o laufanua, ma le aofai o laau e fausia ai le taelega faapitoa leni: E lua vaega o laueleele o ta’ua, o le a tutupu ai laau o le taelega: e fa le tasi, ae tolu le isi, maua ai le fitu o laa’u, ae tasi lava le taelega. E tofu le tagata ma lana faauigaga faaTusi Paia o nei fuainumera, a o nisi faauigaga masani e lagolagoina ai le mau a Isaia:

o le lua – o lona uiga o le tuufaatasiga, pe aofia uma ai. O le Iutaia ma le nuu ese, o le alii ma le tamaitai, o le pologa ma le saoloto, o le taelega e mo soo se tagata, e lē faailoga lanu, pe faaitu’au. O le lua foi e faasino ia Iesu – o le Tagata a’ia’i, ma le Atua moni. O le tolu – o le Atua Tolu Tasi Paia – o le Atua foafoa, o la e ana le pule e faia ai mea uma. E ui ina o le faatofalaiga a Kuresa le Sili ma le Malo Peresia na toilalo ai Papelonia, a o le faasinoga lena a le Atua, e pule i malo. O le fa – e faasino i le atoatoa o galuega a le Atua i le lalolagi, i ona itu lagi o sasa’e, sisifo, toga ma matu. E faasino foi i le atoatoa o molimau, a Evagelia e fa. O le taelega e faatino i le lalolagi nei, a e faamautu i le taelega e faavavau.

Ma le fitu – o le numera o le atoatoa, o le paia, mamana ma mamalu o le Atua silisili ese. O le faitau aofai, e sefulumaleono - faasino i le alofa e lē maluelue o le Atua mo ona tagata.

O laau aupito ta’uta’ua nei, e sili ona sailia ma mana’omia e tagata, i laufanua o Palesitina ma Suria, le Ioritana ma elelee o Israelu. E lasi o latou aogā; a o le faamamafa iinei, e lē o fuata mo taumafa, a o lo latou tupu tele, o le tino malosi ma anagatā, faapea ona paolo. Ua faasino i le mana ma le malosi o le Alii le Atua o Israelu, o lona alofa ma lana pule, o lana tausiga, mo le saogalemu ma le puipuiga malu o ona tagata. O laau ua filifilia faapitoa, e fai ma faailoga, o tagāvai ma mitamitaga a nuu ma malo. O le ‘arasi’ ua lauiloa, o le lalelei matalasi o Lapanona;

(Fa’aauau itulau 11)

FAASOLOGA FONO TELE 2025
MALUA, ASO 12 - 23 ME

“O LE EKALESIA MALE NUU FOLAFOLAINA: FOA’IINA MAIE FAI MO OUTOU”
“The Church and the Promised Land: Given for you to possess” (Iosua 1:11e)

<u>ASO</u>	<u>TAIMI</u>	<u>FONO & SAUNIGA</u>	<u>NOFOAGA</u>
ASO GAFUA	10.00am	Komiti Faatonu	Fale Mafutaga
12/5/25	7.00am	Asiasiga Komiti Atina’e	
	9.00am	Faletua Au Toeaina	Fale o Tina
	1.00pm	Fono Komiti Atina’e	Fale Fono
	7.00pm	Lotu Talosaga Au Toeaina <i>Ta’ita’i: Aviti Etuale FT</i>	Fale Iupeli <i>Vitoria</i>
ASO LUA	9.00am	Komiti Au Toeaina	Fale Mafutaga
13/5/25	9.00am	Komiti A’oga	Fale Fono
	9.00am	TPT - Tautua Puapuaga o Tagata	Fale o Tina
	7.00pm	Komiti Faamisionare	Fale Fono
ASO LULU	9.00am	Komiti Feau Eseese	Fale Fono
14/5/25	9.00am	Sosaiete Au Taumafai	Fale Mafutaga
	9.00am	Fono Mafutaga Aoao Tina	Fale - Papauta
	10.30am	Lotu Tatala Fono Tupulaga <i>Ta’ita’i: Maleifua Tanielu FS</i>	Fale Iupeli <i>M.A.K.</i>
	2.00pm	Pepa mo Tupulaga Talavou <i>(Faataoto Fuafuaga mo le Fono a Tupulaga)</i>	Fale Iupeli
	7.00pm	Lotu Au Taumafai <i>Ta’ita’i: Fuatai Simanu FS</i>	Fale Iupeli <i>Falealili Safata Siumu</i>
ASO TOFI	9.00am	Komiti Tupe	Fale Mafutaga
15/5/25	9.00am	Sosaiete Au Leoleo	Fale Senetenari
	9.00am	Lotu Mafutaga Tina	Fale Iupeli
	9.00am	Fono Tupulaga	Fale Fono
	1.30pm	TPT - Teine Papauta Tuai	Fale Tina
	7.00pm	Lotu Nuue E <i>Ta’ita’i: Iona Paniani FS</i>	Fale Iupeli <i>Aana</i>
ASO FARAILE	5.00am	Lotu Au Leoleo	Fale Iupeli
16/5/25		<i>Ta’ita’i: Elama F. Alao FS</i>	<i>Niusaelese</i>
	9.00am	Lotu 150 Tausaga o le Fono Tele <i>Ta’ita’i: Tunumoso S. Iosia FT</i>	Fale Iupeli <i>Ta’ita’ifono</i>
	10.00am	Faafiafiaga	Kolisi o Malua
	7.00pm	Sosaiete Malua Tuai	Fale Mafutaga
ASO TOONAI	9.00am	SAUNIGA O LE FAAUUGA	Fale Iupeli
17/5/25		<i>Ta’ita’i: Leaso Tupa’i FT</i>	<i>Faasaleleaga</i>
		<i>Tusi Paia: Aila Patea FT</i>	<i>Vaimauga</i>
		<i>Tatalo: Auvaa Peseta FT</i>	<i>Apia</i>
		<i>Faaaelima: Leaso Tupai FT</i>	<i>Taitai Sauniga</i>
		<i>Asotasi Gu Time FT</i>	<i>Taitaifono KAT</i>

ASO TOONAI 17/5/25	9.00am	Faaeelima: <i>Faleulu Malaulau FT</i> <i>Isaako I. Patea FT</i> <i>Pati Vili FT</i> <i>Tunumoso S. Iosia FT</i> Tuuina atu A'oa'o: <i>Amuia Seuala FT</i>	<i>Niu Sila Saute</i> <i>Niusaelese</i> <i>L-L-Aleipata</i> <i>Taitaifono Fono Tele</i> <i>Failautusi KAT</i>
	2.00pm	Lotu Tupulaga Ta'ita'i: Iosefa Afutiti FS	Fale Iupeli Faleata
	3.30pm	Faafiafiaga	Faleata
	7.00pm	TUFA FAILAA USUFONO	Fale Fono
<u>ASO SA</u>			
18/5/25	9.00am	LOTU TAEAO/FAAMANATUGA Ta'ita'i: Pouniu Faamausili FT LOTU TAEAO/FAAMANATUGA Ta'ita'i: Paul Gray FT	Fale Iupeli Aukilani Fale o Tina Vitoria
	6.00pm	LOTU AFIAFI Ta'ita'i: Tautua Aurelio FT LOTU AFIAFI Ta'ita'i: Malo Afia FS	Fale Iupeli Faleata Fale o Tina L-L-Aleipata
<u>19 - 23, USUIA LE FONOTELE</u>			
ASO GAFUA 19/5/25	8.30am	Tapuaiga Amata Ta'ita'i: Tunumoso S. Iosia FT	(Taitaifono)
	9.00am	Tauvalaauga	
	9.30am	Palotaina o se Sui Taitaifono	
	10.00am	Pepa: Brian Korla FS	(Kolisi Malua)
	10.30am	Faalauiloa o Tusiga - Malua	
	11.00am	Amata Taulumaga o le Fono Tele	
	1.00pm	Malolo mo Taumafataga mama	
	2.00pm	Fa'auau Taulumaga o le Fono Tele	
	5.00pm	Malolo le Fono	
	7.00pm	Poloketi 200 Tausaga o Malua (Matagaluega Manukau)	
ASO LUA 20/5/25	8.30am	Tapuaiga Amata Ta'ita'i: Peteru Tone FT	(Penisione)
	9.00am	Fa'auau Taulumaga o le Fono Tele	
	1.00pm	Malolo mo Taumafataga Mama	
	2.00pm	Fa'auau Taulumaga o le Fono Tele	
	5.00pm	Malolo le Fono	
	7.00pm	Faafiafiaga (Autalavou EFKS Onehunga)	Fale Senetenari
ASO LULU 21/5/25	8.30am	Tapuaiga Amata Ta'ita'i: Vagatai Vaaelua FS	(Penisione)
	9.00am	Fa'auau Taulumaga Fono Tele	
	11.00am	Sauniga Aloaia Au Penisione Ta'ita'i: Tunumoso S. Iosia FT	Fale Iupeli (Taitaifono)
	2.00pm	Fa'auau Taulumaga Fono Tele	

	5.00pm	Malolo le Fono	
	7.00pm	Polokalame (<i>Samoa Gambling Control Authority</i>)	
ASO TOFI 22/5/25	8.30am	Tapuaiga Amata Ta'ita'i: Siolo Tauati FT	(Penisione)
	9.00am	Fa'aauau Tualumaga Fono Tele	
	1.00pm	Malolo mo Taumafataga mama	
	2.00pm	Fa'aauau Tualumaga Fono Tele	
	5.00pm	Malolo le Fono	
	7.00pm	Feiloa'iga Au Toea'ina & Auaigaluega Faife'au	
ASO FARAILE 23/5/25	8.30am	Tapuaiga Amata Ta'ita'i: Tunumoso S. Iosia FT	(Ta'ita'ifono)
	9.00am	Fa'aauau Tualumaga Fono Tele	

TAUALUMAGA O LE FAASOLOGA O LE FONOTELE:

- 1 Faamaonia I'ugafono Fono Tele 2024**
- 2 Mau Tuu Sa'o mai Matagaluega**
- 3 Mau Tuu Sa'o mai le Laulau o le Fono Tele**
- 4 Mau Tuu Sa'o mai Komiti Tetele e Ono a le Ekalesia**
- 5 Faamaonia Galuega a Komiti**
 - i. Komiti o Tupe
 - ii. Komiti o Fe'au Eeseese
 - iii. Komiti o A'oga
 - iv. Komiti o Atina'e
 - v. Komiti Faamisionare
 - vi. Komiti Au Toeaina
- 6 Tala Faatatau o Tupe: 2025 - 2026**
- 7 Palota Sui Ta'ita'ifono**
- 8 Suiga o le Nofoa Taitaifono**
- 9 Lotu Faai'u & Tapunia Aloaia le Fono Tele - Taitai: Taitaifono Fono Tele**

FAILAUTUSI

TAELEGA I LE VAOMATUA

o le setima, le matagofie o Karamelu, le atasi, le lalelei o Saronā. Le olive lauiloa i tuamaota o Ierusalemā. O ni laau e tutupu laulauā, mafalā ma maualuluga, e lē faigofie ona lia'iina i matagi ma afā. O laau e anagatā, na fausia ai malumalu tapua'i, o maota o tupu ma alii sili, o pa ma mea paia e pei o le Atolaau a le Alii.

O le Taelega i le vaomatua. O le fuafuaga paia, na amatamea ma taulamua ai le Atua, mo le faaolataga o lona nuu. O se taelega sa faatupu faamoemoe ia Isaraelu faatafea, ia latou mautinoa e lē o tuulafoaiina pe faagaloina i latou e le Atua. O a sauaga o faia e tagata, o loo Ia silafia manino; ma na te tauia foi, i lana faamasinoga amiotonu, i lona taimi e finagalo ai, i ana auala e lililo i le manatu o tagata. Na te lē tuulafoa'iina le nuu na Ia filifilia, a e alofa i ai e faavavau; na te lē tuufauina foi le tagata amioleaga, o loo sauaina i latou.

A o se taelega foi e le'i faapumo'omo'o, a e o le faaolataga aoao tetele, mo le lalolagi atoa; e lē faapito na o Isaraelu, a e aofia ai ma nuu ese. Le taelega e faia e le Mesia – o le Tupu ma le Toa mai le laina o Tavita; o le Suli moni e totogo a'e faatatupu, o le Laau e toe oso a'e mai le fanua naumati, le aigatupu faapea ua motu lona gafa. A o le Mesia lea, e tini ma gata ai.

Pau o lea, o le Mesia e matua'i ese lana faigamalo, e fou lana anavatau, e lē taliagofie ana auala, auā e tuufaafegai ana pulega, mai faiga masani a le lalolagi. O le Mesia e puapuagatia, na te faamuamua foi le tagata puapuagatia. O le taelega na te faia, e lē o vai masani, a o le vai e tafe mai lona tino paia, ma le toto e maligi mai ona manu'a ma ona faalavalava, i lona tautau ai i le Laau.

Le paia o le au faitau Sulu Samoa, o se feau faamanatu foi mo i tatou. E lē o faagaloina i tatou e le Atua, na te lē tuulafoa'iina i tatou. I le gasologa o le soifuaga masani, i ona tiute ma faiva i totonu o aiga, o nuu, aemaise i pulega ma faigamalo i nei aso. Tatou te lē o faatafea i nuu ese. A o le vaai atu, e pei tatou o pulea e ni tagata Papelonā ma Filisitā, i tu ma aga o ta'ita'iina ai, ua leai se faailoga o le ola matata'u i le Atua, ua mativa le alofa i tagata, ua saili le manuia o le toaitiiti i le ola o le lautele, a o sasao fa'aafi soligatulafono ogaoga; ua lamatia tupulaga fai mai, ua lē saogalemu mai pulega faamalosī, ma sauaga mataga. O totonu foi o le Ekalesia ma le soifua faatuatua, tautua ma auauna mo le Malo

Keriso. E i ai aso e faatafea ai lagona, i mea faafatiatama'i e tautevateva ai.

Ua faamanatu mai, ina tatou loto tetele pea ma faamalolosi, e i ai le faamoemoe. Taula'i pea le vaai ia Iesu le fofō ma le tali, a e lē o le sioa i faafitauli. O loo Ia silafia manino, o tatou tiga ma faanoanoaga. Na te saunia auala o le faaolataga, e lavea'i ai i tatou, ma fai le tau amiotonu. Ua Ia fetalai manino, *“Ia outou o mai ia te a'u, outou uma o e tigaina ma mafatia i avega, o a'u e malolo ai outou.”*

A o se toe fafagu foi i lo tatou leo faaperofeta, e folafola atu ai le faamoemoe mo tatou tagata, ma ta'u atu i ē faatalatū, le finagalo paia o le Atua. Auā a tala le gafa o le taelega ma le vaomatua na valoia e Isaia, e oo lava lona faatinoga, i le misiona a le Ekalesia i aso nei, mo oe ma a'u. E fia maua pea ni arasi loto tetele ma faamaoni, ni setima alolofa moni, ni perosi faatuatua e soosoo tau'au, e molimau, ia tafe tetele le pule, le faamasinoga amiotonu, le alofa ma le filemu o Keriso, seia toe afio mai o Ia.

Ia ia te Ia le viiga e faavavau. Amene.

O LE PEROFETA **MULIMULI**

Pe afai e manatu Penita Koloue e lē faapa'ūina le afāfi, na ia mana'o ia se'i le teine ma o ese. Pe afai latou te faavave, o le a leai se faafitauli. Sa i ai se ulufafo mo faalavelave i le isi faasi'usi'uga o le potu tele, ma e taunuu atu i se fale taavale i lalo o le elelee. O luma atu, na feosofi atu ai fitafita i le faitotoa ma tamomo'e punonou ma le saosaoa i le isi potu. Na mulimuli atu ai Mapeletope, tapuni le faitotoa i ona tua. Na ia lagona atu faatonuga na fai tau musumusu i le kulupu a o latou ui atu faasalalau i le va o loka. Na mulimuli Mapeletope ma lana masini su'e tagata i le taitai, o faafeao faaitualalua i ona autafa isi fitafita. O le na muamua na tamo'e atu i le va o loka, na si'i a'e lona lima. Ua na maua le puna o le faailoilo, ona tuu lea i lalo o lona lima, ma faasino atu.

I le são filemu, na lagona atu ai e Mapeletope se masūsū tau lē lagona o sau mai totonu o le loka.

Ua i'u ina maua.

Na faamau le loka, a o le isi fitafita na se'i ane le seti e tipi ai nati ma se'i ese le loka.

Na talo atu Mapeletope. Ua le lava se taimi o totoe. *“Faanatinati!”*

Na tago atu le ta'ita'i fitafita i le loka tia'i ese a e tatala masau le faitotoa. Na iloa atu e Mapeletope

se laau pu'eleo, o se leitiō faasalalau ma se fana Tasera o loo faapipii i le faitotoa.

O se mailei.

Na liliu Mapeletope ma tamo'e saosaoa.

I ona tua, na pa ai le fana ma 'emo ai se aloiafi eletise. Na faataiō Mapeletope a o ia lagona atu se leotele o le faaolaina o se taavale, e pei o le fanaina o se fana kesi. O se emo o le vevela, ona pa salalau mai lea o se polo afi. Na taia ai o ia, piki i luga mai ona vae, ma tata'i atu o ia i le faasologa. Na mu ona 'ofu ma susunu ai lona tua. Na ia feula mai aloiafi i lana manava, o lona atigipoo na mu e tau i ponaivi. Na ia taia i le puipui, ua le o toe foliga i se tagata, ua na o se faaputuga o afi o loo taavili i tiga ogaoga.

Na ia taavale solo a o mumū e tau saili se mapusaga mo le faavavau seia oo ina faapulou e le pogisa ma faalelea ese.

O lalo ifo i le isi fogafale i le potu koleni, na lagona atu ai e Penita le faataiō mai le potu loka falema'i o loo i luga tonu. Na ia tatao le mailei i luga, ma lona iloa e sau Mapeletope e saili le teine i ona faailoilo. Na ia faataatia ai se tasi o leitiō feliuliua'i e masani ona fa'aoga e tata'i mai ai elikopa i le fale saogalemu. E pei ona sa faia muamua, na ia seti le mailei ina ia faata'ita'i i le faailoilo a le teine.

A o laitiiti, sa masani ona o Penita e fanafana ma lona tamā i le fanua Faasao o Masanatuki, o le nuu o ona tagata. Na ia ola a'e ai ua lelei i le faiga o mailei ma le faasesē o manu e tuli.

O le aso lenei e leai se eseese.

O lana mailei ma le solaaga faafoliga ua na tata'i ai nisi e pei o mogamoga i le afi.

Ma e pei o na mogamoga, na latou fetiloai ai ma lo latou i'uga i le susunuina.

Sa leai se manatu salamō o Penita i lana mailei sa fai. Na ia manatua ma vaaia pea Makenaiti i lona pa'ū ifo i le fola. E toalua ma nisi o le aufaigaluega na fasiotia foi. Na siaki e Penita lana uati. O le vae sekone na pasi ese ma le sefululua, ua kolosi ai le taimi tapulaa o le sefe-toilalo na seti mo le ta o le tasi.

Na taofi lana manava, a e leai se mea na tupu.

Talu ai nei, i le mae'a ai ona seti le saogalemu-toilalo, na ia sola ai i le potu faa inisinia ma tapē atoa le fesootaiga o faaeletoroni. Na ia mana'o ia tumu fogafale i kasa faavave ai le mu, peitai na sa'o lava Mapeletope. E le mafai e Penita ona tuu alii ma tamaitai na pu'e e le vaega o fitafita ina ia oti, e oo lava i le puipuiga o le teine. Ona ia tatao ai lea o le

mailei, e faakasa na o le potu e tasi, ma tata'i atu i ai Mapeletope ma lana vaega.

O le to'aititi o fitafita na salalau ma lo latou ta'ita'i ua fasiotia, o le toatele na sosola ma ninimo atu i le pogisa.

Na faalagolago atu Lisa ia te ia. "Pe mata o le a sosolo le afi?"

O le tali na sau mai luga. Na ola mea fuimū o le fale, ona masa'a ifo lea o le vai ma le 'oa i o latou luga. "Ua uma?" na ia fesili ai.

Na lue le ulu o Penita. "I inei lava ia, ua uma."

A e ui i lea, na iloa lelei e Penita, o le tulaga o i ai i isi itu, e le'i taitai ona mae'a.

10.53 taeao.

Piripiate, Ukureini.

Na tamo'e saosaoa Karai aga'i i le faitoto'a uamea ua tapunia i le pito i tua o le fale teu taavale lapo'a. Na ia patapatatū ifo i le auala i le va o ala taavale uumi. Na ia pasi atu i tino maliu o tagata e toa lua, na fana i o la ulu.

Na pā pā le ta ta o lona fatu i ona taliga, a e na ia lagonaina atu le feei faamanuia mamao mai o tagata i le nofoaga mo lauga, e pei o se tuuga o le fa selau mita o loo ia ausulusulu atu i le tini. Pau lava o lea o le tuuga lenei, o le ola o tagata matamata o loo faalagolago i lona tini i le taimi e tatau ai.

O lana toe uuna'i atu mulimuli, na ia taunuu ai i le avanoa ma solovī atu lona manava i lalo o le faitotoa o faifi. E pei o loo ia sosolo atu i se avanoa i lalo o le fale. O le faitotoa e faitau iata lona mafiafia, fausia i lau uamea. Na ia totolo atu a o fa'aauau pea le pa'ū ifo o le pito, na tanumia ma tatao ai o ia. O lona fatu na mu i le fememea'i. Na ia feausi ma kiki, sosolo faaanufe atu ai i luma a o atili ai ona ia faamafolafola i lalo o le faitotoa mafiafia.

Na i'u ina ia taunuu i le faai'uga ma taavale atu ai i fafo i totonu o se avanoa pei se ana. Na ia vaai ma maitau uma mea mo sina tata o le fatu: o se nofoaga tele i totonu, o loo laina ai fatāmanu, o puipuia ai se fausaga fogafale sefulu o simā ma uamea ua faauliuli. O le Sarakofagusī lauiloa lenei, le tuugamau i luga o le afi lona fa. O le taimi nei, ua toetoe lava ufitia atoa le potu sā, i le fale ofuofu. O tala atu o le Sarakofagusī na ea a'e ai se pa simā. O le fale ofuofu e uma lona sosolo ona faapipii atu ai lea agai i le pa lena, ma faamau atoatoa ai loa le Sarakofagusī.

A e mo le taimi nei, o se susulu faalo'ulo'u o le la na sulua ai le Sarakofagusī e pei o se nuanua afi. Ua na

o le pau lea o le mea o totoe avanoa mo le lalolagi. A o pulato'a atu Karai, na faasolosolo ina vaitiiti le susulu a le malamalama.

I le itu agavale, na lagona atu e Karai se tasi o tautala faaRusia i fafo o le fale faaofuofu, e mimita toe lototoa, o faasalalau leotele mai le tulaga o lauga. Na ia faalogoina foi le solosolo malie atu o siaki uamea a o latou tulei atu le fale faaofuofu i nai futu o totoe.

I le itu taumata, na pa mai ai se fana.

Na iloa atu e Karai tino o tagata o i fafo.

O loo tuua e Nikolao se auala o nutiga falaoa, e faigofie ona mulimuli atu ai.

A o tamo'e saosaoa atu Karai i le itu lena, na ia punou maulalo a o ia fe'alofa'i solo i autafa o faaputuga uamea mafolafola, o se faaputuga o piliki ta'ei, ma se lifi. Na manogi suauu ma elea le 'ea. A o ia taunuu i le tulimanu o le Sarakofagus, na ia se'i ane lana fana mai lona fusipa'u. Na autilo atu i le tulimanu, ma iloa atu se tagata o setusetu atu i le avanoa o susulu vaapiapi ai le la. Ua tusa toe luasefulu iata lona mamao mai lona sao atu i le solaaga saogalemu. Na faata e Karai lana fana. "Nikolao!" na taufonō atu ai Karai.

Na te'i le tamaloa ma liliu mai mai i tua.

"Aua e te toe minoi!" na valaau atu ai Karai.

Na tau autilo mai Nikolao mo sina sekone, ona liliu lea ma sola i le atoa. Sa le'i manatu Karai e fasioti le tamaloa. Se'i ona iloa muamua pe se a lana peleni sa fai. O le ala lea na ia faata faalelei ai lana fana ma faapa loa. Na motu ese le vae lelei o Nikolao, ma ia taavale ifo ai i lalo.

Na faanatinati atu Karai ia te ia, peitai o le ituaiga tagata e i ai Nikolao, e le'i faaeaina i lona tulaga ta'ita'i maualuga, i auala o le ta'ata'ai i totonu o le vevesi. Na taavale ese atu le senatoa i tua o faaputuga uamea uumi. Na tafana atu pulu ia Karai, faamalositia ai lona fe'alofa'i i autafa. Na ia maua se lafitaga i tua o faaputuga laupapa.

"Kioti! Rotilasia keresi iopu!" Na upuvale ane Nikolao faaRusia, o lona leo ua faasolo ina faataiō ua ma'i aitu. Na ia faataiō atu ia Karai. "E le mafai ona ta nonofo iinei, lou solovoka! E le atoa se tolu minute o totoe mo ta'ua."

O tua atu o le lafiga o le tamaloa, na iloa atu ai e Karai le susulu o le la i le va o pa sima tetele ma le fale faaofuofu o sosolo malie latalata mai lava. Ua toe lava o le fa futu le avanoa o totoe. E leitioa faanatinati Nikolao.

"Ta'u mai pe faapefea ona taofi le Fuafuaga Uranusi!" na valaau atu ai Karai.

"E leai se auala e toe taofi ai! Ua uma ona seti mea uma. Na pau le mea tatou te faia o le o ese mai le auala... i le taimi nei!"

"Ta'u mai po o le a le mea ua e faia."

"Ua lelei! O pomu! O loo tatao i totonu o pou i le isi itu o le Sarakofagus. Latou te saeia i lalo puipui ma fa'aaliali ai i latou uma i lena itu i le kasa oona fasioti tagata faaniukilia. E leai se auala e toe tape ai na pomu. Ua TATAU ona tatou o ese loa!"

Na taumafai Karai e folo i totonu le mea na ia faalogo atu i ai, a o tau saili se fofō e lavea'ina ai. E tusa lava pe na te tamo'e i fafo ma tauvalaau ina ia o ese tagata, ua tuai tele lava.

"E leai se mea o le a ta feoti faatasi ai fua ma latou," na fa'aauai ai Nikolao. "E manaomia e le lalolagi se isi faatonuga fou. E manaomia ni alii totoa. E pei o a'u. E pei o oe. O le tatou vaega e faaleleia le tulaga o le fanau a tagata, ina ia fausia faamalosi se Suiga fou."

Na manatua e Karai le talanoaga talu ai a le senatoa e uiga i le faatuina mai o se perofeta fou i luga o le laasaga o le lalolagi. O lona uiga o le auala lea na ia fuafua e faataunuu ai, ina ia faatupu se vevesi i le lalolagi, ona ia ofo atu lea o se fofō, e taulamua ai se tagata e ta'ita'iina, fautuaina ma faatonutonuina e tamaiti atamamai faapitoa.

"E tusa lava pe tatou te feoti iinei," na tauanau atu ai Nikolao, "e lē mate ai le faamoemoe. O loo i ai fuafuaga o loo faagasolo e le mafai ona toe taofia. O lo ta oti e leai se aogā. Ia e faatasi mai ia i matou. Matou te fia fa'aaoga tagata lelei pei o oe."

O le upu moni, e leai se auala o mafaufau i ai Karai e taofi ai le mea o le a oo mai.

O tua atu o Nikolao, o loo tapuni malie ai puipui.

"Toe lua minute!" na ia valaau atu ai ia Karai. "O loo i ai le potu faatonutonu i fafo atu. E mafai ona ta oo i ai pe a ta o loa i le taimi nei!"

Na feliua'i Nikolao i lona lafitaga, ua manino lona sauni e tamo'e ese. Peitai o le tasi ona tapuvae o loo milositia a o le isi ona vae o loo lavea, na te iloa o le auala o loo fuafua e mautinoa e oo i le oti.

A e faapena foi pe afai e nofo pea iinei.

Na i'u ina tia'i ese e Nikolao lana fana, a e laa ane i fafo i le laolao. Na la fesaga'i ma Karai, o ona lima o faalālā i ona itu, o tau piipii i ona vae. "Afai na o le pau lea o le auala e ola ai, o le a faapea ona fai!"

Na palauvale Karai i lana mānava. Ua lē mafai ona taofi le oo mai o le oti, na pau lana gaioiga o le pu'e

o le fasioti tagata na ia fuafuaina lenei gaioiga mata'utia. Na laa ifo i fafo Karai ma lana fana o loo faasino pea ia Nikolao.

I le taimi lena, na faataiō mai ai le leo o pamu eletise.

O loo tauave le mamafa e lua afe tone, ua amata ona gogolo le faaofuofu.

O le a le mea ua tupu?

Na sitepu atu Koualasaki i luga o fitafita ua maliliu ma faatasi atu ia Elena i le nofoaga faatonutonu. A o sola tamo'e ese atu Karai, a o Elena na ave atu le pasika e pei se ti'eti'e pasika tutu'u o loo lele. Na pipii mau Koualasaki i pito o le taavale o i le itu o le pasika, o ona tamatama'ilima sa gatete. Na la'ua felelei faaroketi atu i le itu i tua o le ala uamea ma folau atu ai i se faleoo simā sa mulimuli atu i uaea lapopo'a.

O le fale faatonutonu ai siaki tetele alu i suauu.

O se fetauiga o afi tele sa mulimuli mai ai e ui ina sa le'i umi se taimi.

Na taumafai Kousalasaki e fesoasoani, a o Elena sa taavili pei se teine siva ma lana fana taavili. Na ia siva ma fe'alofa'i solo i le va o pulufana e peisea'i sa ia faatalitali mo pulufana uma. Na ia tafaanaina fitafita e to'afa. O Koualasaki na o le toatasi na ia fasioti.

O tama a Nikolao, na fai atu ai Elena ina ua uma le tauga fana.

Na oo loa i totonu, faasaga loa Elena e fai lana galuega. Na ia punou atu i luga o le laupapa faatonutonu, ma tulei atu pamu aga'i i le laina mūmū, o loo taumafai e tapuni faavave le fale ofuofu.

O fafo tonu lava o le faamalama o le fale, na asu a'e ai se tasi o afi tele, ua foliga mai o le a pasae. I luga o se tasi o televise, na emoemo mai ai molī o lapataiga mo faalavelave.

E le o se vaaiga lelei.

Na laa ese Koualasaki mai ia Elena ma autilo atu i le laina o televise. Na latou faailoa mai ata vito mai totonu o le fale ofuofu. I le televise ogatotonu, na iloa atu ai e Koualasaki ni foliga laiti o tagata e toalua o i luga o le fola.

O Karai ma le tamaloa Rusia.

Mai le tulimanu o le meapu'eata, na mafai e Koualasaki ona iloa atu mea sa le'i iloa e Karai.

Oi auē!

"Elena!" na ia valaau atu ai. "Fia maua se fesoasoani iinei!"

Na ia liliu atu, fetau tonu ma le iloa atu lona pa'ū faafuasei ifo i le fola. Na ia aapa atu ma pu'e mai i lona puimanava. Na maua atu e lona lima lona lau

sakete i lalo o lona peleue, sa susū ma vevela. Na ia tatala le peleue ma iloa lona itu agavale atoa o lepa ai le toto. E foliga mai o lana siva sa le'i aunoa ma se sasi e pei ona sa ia ulua'i manatu ai.

"Aisea na e lē fai mai ai?" na ia fesili ai ma le tiga i lona leo.

Na talo atu le lima o le tamaitai i televise. "Faasino mai ia te a'u."

Na taumafai Karai e malamalama i le faafuase'i ona televave le tapuni o le faleofuofu. O le mamafa e luasefulu afe tone e le faigofie ona faagaioi, peitai sa manino lava ua televave lona tapuni, faatasi ma le faataiō o afi ma pamu.

"Leai!" na valaau mai ai Nikolao.

Na maitauina e Karai le ita i lona leo e itulua: o le fefe ina ua iloa ua itiiti lava le taimi o totoe e sola ai, ma le atuatuvaale ona o ana fuafuaga o le a faaleagaina pe afai e vave ona tapunia le faaofuofu. "Ta o!" na fai atu ai Karai, a o faasino atu lana fana i le tamaloa.

Na faamaulalo e Nikolao ona lima sa faalala – ma faailoa mai ai le mea sa lilo i tua o faaputuga ivivi. O lima o le tamaloa sa le iloa atu seia oo mai i le taimi nei.

O se isi tama'i fana lona lua.

Na faasino i le manava o Karai ma faapa loa.

Na mafai e Karai ona 'alo ese i le itu, peitai sa mafai lava e le pulufana ona taia ma ulu atu i lona manava. Na ia faasino atu lanai a fana ma faapa. O le pulufana, na sesē ese ona o le osofaiga faafuase'i, ma lelea ese i le fola. A e sili ona leaga, na matala i luga le utupulu o le fana.

Ua uma ana pulu.

A e sa le'i faapea Nikolao.

Na faasaga atu le Rusia o le a fasioti loa Karai.

O le i'uga o le faato'ato'a lelei o lana vaai ma le fasiotiga tagata o le a fai, na misia ai e Nikolao le minoi ma gaioiga i luga a'e i le tauluga o le faaofuofu. O se taavale kololi samasama tele i luga a'e na faapa'ū ifo ai se faamātau lapo'a lava.

O lona leo faaili a o ia lele ifo na tosina atu ai le vaai a Nikolao. Na ia tepa a'e a o pa'u ifo le faamātau uamea lapo'a, e mafai ona taula ai vaa tetele, ma taia i luga o le faaputuga o iviivi sa i ona autafa. Na ia taumafai e oso ese i le itu, peitai na salalau le faaputuga ma lelea atu ai nisi iviivi ma taia ai ona vae.

(E faia pea...)

O LE SULU I O'U VAE

O MASIMA & MALAMALAMA

*“¹³O outou, o le masima o le lalolagi outou...¹⁴O outou, o le malamalama o le lalolagi outou..”
Mataio 5.*

Ua a’oa’o mai i tatou e Iesu, e ala i nisi o faatusa tatou te iloa lelei – o le **masima & malamalama**, auā o mea masani tatou te fa’aaogā i aso fai soo. O le faamoemoe o le Alii, ia a’oa’o ina ai i tatou o ona soo i le ituaiga molimau ma tautua, tatou te mulimuli ma auauna atu ai ia te Ia; ma ia fai ai i tatou mona sui vaaia i le lalolagi nei. Tatou toe asiasi i nisi uiga faafaataoto o nei meafaitino:

(i). O le masima. O ona aogā e aofia ai le(a) faa’oona o taumafa ma vaiinu, ina ia tofo lelei, (e) ia faasao, faatuma ma faa’umi ai le lelei o taumafa (pei o le faa’oona o aano manu fasi ma i’a), (i) o le fai ma vaila’au e togafiti ai manu’a ia vave ona pe, ma ia ‘aue nei a’afia i siama (o) faamamā ai ipu ma ulo ma isi mea, (u) e tofotofoina ai le lelei pe leaga o nisi mea, pei o fuamoia (tuu le fuamoia i totonu o se ipuvai ua faamasima – afai e opeopea o lona uiga ua leaga, a e afai e magoto o loo lelei), (f) e tutuli ese ai iniseti faalafuā e pei o loi (g) faigofie ai ona aveese mea lē manaomia (faamasima le i’a e faigofie ai ona unafi ese ivi, ma lavea’iina ai le tagigi), ma nisi anoano o ona aogā. E mafai ona taaofa’i nei uiga uma o le masima, i le upu ‘faatamaoiga’ (enrich).

Na o le pau lava le tulaga e lamatia ai le lelei, le aogā ma le saogalemu o le masima, o le umi o nofonofo i totonu o le fagu/ipu e lē fa’aaogaina, e susū ai ma mafafafā, e te’a ai lona oona ma le tofo, ma faigata ai ona lūlū ma sasa’a mai i fafo. *A lē fa’aaogā, ua lē aogā.* Ua a’oa’o mai Iesu, *“O outou, o le masima o le lalolagi outou; a e afai e magalo le masima, pe se a se mea e faamāi ai? E leai se mea e toe aoga ai, na ona lafoa’iina i fafo, ma solia e tagata.”* O lona uiga, e lē lava le na o lou fiefia ma toaga e faitau le Tusi Paia, e su’esu’e ma maua ai le atamai na o oe; a e tatau ona sasa’a atu lena tamaoiga, ina ia faatamaoiga ai nisi tagata. E leai foi se aogā o au lauga mananaia ma tapenaga e tele, pe afai e lē malamalama ai, ma oo atu le feau i isi tagata.

(ii) O le malamalama. O loo feagai nei Samoa ma le faafitauli o le pe soo o le eletise, ua motusia ai le

malamalama i le tele o po. O aogā o le malamalama (aemaise le malamalama o le la) e aofia ai - (a) e suluia ma iloa atu ai lo tatou siosiomaga; a aunoa le malamalama, ona tutusa lea o le tagata tauaso ma le tagata e lelei ona fofoga - na ona fai o mata, a e lē iloa atu se mea; na ona fai foi o vae ma lima, a e tau tagotago ma tautevateva, pe a leai se malamalama; (e) e faatupu lototele, fiefia, nai lo le pogisa e faatupu fefe, popole ma faanoanoa. (i) E faatupu mafanafana, a e lē o le maalili ma taaligoligoa. (o) e faatupu ola, faafou ma lanu meamata i laufanua (pe a ufiufi le mutia i se fala po o se ‘ie, e le pine a e magumagu ma mago).

O le a’oa’oga a Iesu, ia ‘aue nei o tatou faaesea mai le lalolagi, a ia susulu atu ina ia suluia ai isi tagata. O le pogisa e le o se fili o le malamalama pe lamatia ai foi le malamalama; a o le pogisa, o le tulaga/laasaga lena e sili ona lelei ai ma aogā le malamalama - e leai se uiga o le ki o le moli uila, a o loo mumū moli o le fale, vagana ua pogisā, ona faato’a aoga lea o le moli uila.

O la Iesu, *“¹⁴O outou o le malamalama o le lalolagi outou. E le mafai ona lilo le aai e tu i luga o le mauga. ¹⁵Latou te le tutuina foi le moli i le tuu ai i lalo o le mea e fua a’i saito, a e tuu i luga lava o le tuugamoli ia pupula atu ai i e i le fale uma. ¹⁶Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi.”* I le lalolagi nei (aemaise lava i lo tatou atunuu ma lana faigamalo), ua mata’utia le tulaga ua oo i ai amioga a tagata, aemaise i ta’ita’i ma le vasega o le au matutua e faalagolago i ai le saogalemu o tupulaga fai a’e. E peisea’i ua leai se manogi lelei ua leai se masima, toe pouliuli faasoloatoa aunoa se malamalama. O ai a faia se suiga? O ai a faia se lavea’i mo tatou tagata?

Ua valaauina i tatou o talitonu ma faatuatua ia Iesu Keriso, ina ia tatou faamasima ma faamalalamalama lo latou atunuu ma le lalolagi atoa; ia lavea’i o tatou tagata mai le faaumatia i le leaga, pi’opi’o ma amioga faatevolo uma, e pulea e soliga tulafono ma auala faamailei, faatogafiti uma. Ua tuuina mai ia i tatou le lu’i, e faamalolosi ma loto tetele, ina ia faasusulu atu le malamalama o le ‘Tala Lelei’, i e o ola i le pogisa faaleagaga. Faamasima loa ma faamalalamalama nei.



Faifeau Pule Kolisi Faafaifeau Malua, Susuga Professor Dr. Vaitusi Nofoaiga FS ma nisi sa molimauina le osiga feagaiga, EFKS Lufilufi, Apia Sasa'e



Milly Alo Pita, Peni Meaalofa FS (na Lauga), Siaosi Samoa FS ma nisi sa auai.